

# Ino Palunguwa Turakki Pablo Ki Timoteo

## Ino Mapeafu Sitawa Turak

I Timoteo, tata a buwanaka dina'nga i Pablo sin nangibanyanna sey sako'ma Licaonia. Gafu se natalanggaddino angngurungnga ki Kristo, inayani Pablo a mebulun sikwana a manuffun sino tarabafuna a mangibanyag anna manuldu. Ino tata a lubbuna nibanyanda, sey Efeso, e i Timoteoweno nepatali ki Pablo a manuldu sino pakkakarampattanino manguruwira sinay. Wasin nabayinni Timoteo sinay, kase nanurakki Pablo sikwana. Nasurukin si tallufuluweno dawuni Timoteo sin nanurakkani Pablo sikwana.

Ino tata a napatig sitawa turak, ino mapeafu sino tulduwa bakkanna gakkurug. Netuni Pablowi Timoteo ta paibbattanneno manulduwera sinaya tuldu (1:3), se ituldura si nu anggangkanuweno tolaya mesalakan, maawag si kammarallandeno korwana maakkan anna ammera kappenad mangatawa.

Ana kappayino netuni Pablo mapeafu sino akwan naddino makkakarampattira a makkararag anna maddayaw ki Dios, ino aggangwa naddino bafabbayira a mangurug, ino aggangwa naddino tolayira a pilinda a pangafuwanda andino pilindera a manuffun sino pangafuwandera, andino akwan naddino manguruwira sino bafulundera a balu, pangafuwan, anda aripan. Ana kappayino korwana netuni Pablo ki Timoteo mapeafu sino akwana nadda masserbi si fustu ki Kristo. Sino uddiya kapituluna, ana kappayino netulduna mapeafu sino manggammira a buma'ngang andino kakuruwana kinaba'ngang.

## Ino Bagga'na Yaw

Ino gafuneno turak *1:1-2*

Ino mapeafu sino manulduwera si bakkanna gakkurug *1:3-11*

Ino nappasalamatani Pablo ki Dios gafu sino alla'nga *1:12-20*

Ino mapeafu sino kararag nu makkakarampattino manguruwira *2:1-8*

Ino aggangwa a tuntulan naddino bafabbayira a mangurug sino  
pakkakarampattanda *2:9-15*

Ino mapeafu sino pangafuwanirana manguruwira *3:1-7*

Ino mapeafu sino manuffunira sino pangafuwanirana manguruwira *3:8-13*

Ino napatyingke a nepakaammuwi Dios sikwatam *3:14-16*

Ino manulduwera si bakkanna gakkurug *4:1-5*

Ino nalawara masserbi ki Kristo Jesus 4:6–5:2  
 Ino netuni Pablo mappeafu sino manguruwira a balu 5:3-16  
 Ino netuni Pablo mappeafu sino pangafuwanirana manguruwira 5:17-25  
 Ino netuni Pablo mappeafu sino aripannira 6:1-2  
 Ino manulduwera si siri andino manggammira a buma'nang 6:3-10  
 Ino korwana netuni Pablo ki Timoteo 6:11-21

### Ino Gafuneno Turak

**1** <sup>1</sup>Ikkanaki Pablo a apostoli Kristo Jesus, se antuweno tureka neya'da i Dios a misalak sikwatam anni Kristo Jesus pinnanamantam. <sup>2</sup>Antuyawino turakku sikwam Timoteo a ibilangku si gakkuruwa abbingku si anngurug. Allakkandaka naddi Dios a Amatam anni Kristo Jesus a Afutam ta duffunandaka nad anna passiyannakkanda naddino nakammu.

### Ino Mappeafu Sino Manulduwera Si Bakkanna Gakkurug

<sup>3</sup>Sin inanawangku sitana umang sey Macedonia, netungku sikwam ta magyangka nad sitan Efeso, e ipidwak kappaya itun sikwam, se ana sitanino manulduwera si bakkanna gakkurug e sapitannu nad sikwara ta ibbattanda. <sup>4</sup>Sapitannu kappay sikwara ta ammera aggadandammannino iistoriyera pelangnga tolaya pinandera si'in andino ata'nangingke a listaanino gagginafurera, se inayira, antuweno paggabwatanino passasarombatanino tolayira. Awana meduffunna sino keyakkuruwanino planowi Dios, se ino annguruddam ki Dios, antu pelangino pangammuwantam anna panuntulantam sino planona. <sup>5</sup>Ino anggangku si pattupakkanino itunnu sino tolayira sitanino panggammanda sino bafulundera. Ino paggabwatannenaya agganggam ino nalawad anna nadalusa nakamma awana narakkat si gakkanna annino gakkuruwingke a anngurug ki Dios. <sup>6</sup>Ino korwanira a tolay, inanawandenaya nalawara aggangwa, e antu pelang aggangdeno mattatarabag sino awana serbina. <sup>7</sup>Angganda a manuldu sino lintiyi Dios, udde ino kakuruwana, ammera maawatanino anggamma a sapitan. Massiki ino sapitanda a ipatu'da si gakkurug, ammera kappay ammuweno anggamma a sapitan.

<sup>8</sup>Ammutam si nalawarino lintiyi Dios a neturakki Moises si'in, nu ino tolaya musar, fustuweno puserana. <sup>9</sup>Dandammantammad si ino naangwanino lintiyira, bakkanna gafu sino naggaddanggira, nu ammena lud gafu sino narakkattira a tolaya kunayaw: ino mangontarera sino lintig andino ammera mappeturay sino turayira, ino ammera maddayaw ki Dios andino minalliwatira, ino ammera miyatal ki Dios andino mappoporayira mappeafu sikwana, ino mamapatayira sino mapparana'dera andino mamapatayira sino korwanira a kasittolera, <sup>10</sup>ino makiduruwira sino bakkanna atawara,

ino lallakiyera a makidurug si kasillalakira, ino mano'mera si kasittolera ta paaripanda, ino massisiriyera andino misapatera si ammena gakkurug, andino amminira a mangwa si massiki sanna a mekontara sino kakuruwana tuldu. <sup>11</sup>Inaya kakuruwana tuldu, naggabwat sino nalawara damaga netalakkino kalalawaran anna madandayawa Dios sikwaka ipakaammuk.

### Ino Nappasalamatani Pablo Ki Dios Gafu Sino Alla'nga

<sup>12</sup>Mappasalamatak ki Kristo Jesus a Afutam a nappatuyag sikwaka mangwa sinaya tarabafuk, se nebilangngaka matalak e dinotukannaka masserbi sikwana. <sup>13</sup>Antuwenayino inangwana, massiki nassapitak si narakkat mappeafu sikwana si'in, nelopalopekkuweno manguruwira sikwana anna pinadyatanguwera. Udde massiki tan nu kunnenoy, inalla'dak kappayi Dios, se ammek kepay nangurug si'in, antuweno ammek inammu si narakkattino akwangku. <sup>14</sup>Dokallingke ino allakka nepaita i Afu Dios sikwak, se nepangurungngak ki Kristo Jesus anna ina'dannak si agganggangu sino bafulungkuwera a kunna kappayino akwanna sikwatama nesapat ki Kristo Jesus.

<sup>15</sup>Gakkurug yawa sapitangu, e kuruwan nad ammina tolay: inangngi Kristo Jesus sito lubag takesi isala'ngeno malliwatira, e ikkanakino karakkattan sikwara. <sup>16</sup>Udde antu kappayino gafuna a inalla'daki Dios, takesi wara pappaitani Kristo Jesus sino ammena mambuta kinaanusna sin inanusandaka karakkattana minalliwat. Inangwanenay takesi antuweno paddandammanino tolayira si damara kappaya mangurug sikwana ta maa'danira kappay si biyaya mannayun. <sup>17</sup>Antu gafuna, meyatal anna madayonad si makkikiyarino Ariya awana pakkiyarano patturayanna. Ammena matay anna ammena maita, antu pelangi Dios a awana kakunnana. Amen.

<sup>18</sup>Ikka Timoteo a abbingku, irayawa itungku sikwam, nekunnera sino nelabbun mappeafu sikwam si'in. Ammemira nad kalyawan inay, se antuweno mappatuyag sikwama makiyubat sino ammina narakkat. <sup>19</sup>Imutannungke naddino angngurungngu e itannu ta ino pelang panggammani Dios ino akwannu. Ammeke nad mekunna sino korwanira a gagguriyatanda a mangwa si narakkat, e antuweno nanaral sino angngurudda.<sup>a</sup> <sup>20</sup>Ino adwa sikwara, da Himeneo anni Alejandro a neyalawakku ki Satanas takesi antuweno padalanda si ammera nad massapit si narakkat mappeafu ki Dios.

### Ino Mappeafu Sino Kararag Nu Makkakarampattino Manguruwira

**2** <sup>1</sup>Kunnayawino palunguwa itungku sikwam. Ikararantammad ammina tolay, arangngantammad ta duffunanira i Dios, anna

<sup>a</sup> 1:19 Ino tata kappaya anggama sapitan: ...e antuweno inanawandeno kakuruwana tulduwa kuruwantam.

mappasalamatetam sikwana. <sup>2</sup>Ikararantammaddino ariyera andino ammina korwan a aneno turera takesi nasiyanakkino biyaddama awana mangungkul, takesi damatama masserbi ki Dios anna mangwa si fustu sino kasittoletamira. <sup>3</sup>Se nalawad nu antuweno akwantam, e antu kappayino mappaanggam ki Dios a misalak sikwatam. <sup>4</sup>Se ino anggammi Dios, mesalakannad ammina tolay anna maammuwandeno kakuruwana tuldu mappaeafu sikwana. <sup>5</sup>Se tata ke i Dios anna tata kappayino nadotukana mangita'dag sino tolayira sikwana. Antuwi Kristo Jesus a nabbali si tolay <sup>6</sup>a nanga'da sino biyangnga takesi manubbut sino ammina tolay. Nakwen inay sino fustuwa tiyempowa piniliyi Dios, e antuweno nangipaitanna si anggamma a mesalakan ammina tolay. <sup>7</sup>Antu kappayino gafuna a dinotukandaka apostola umang manuldu sino bakkannira a Judyu ta ibanyaggu sikwareno kakuruwana tuldu takesi kuruwanda. Gakkurug irayawa sapitangku, ammek massisiri.

<sup>8</sup>Kunna mantu, anggangku si makkararino lallakiyera sino ammina pakkakarampattanino manguruwira, udde nadosanira nadda awana bungu'da onnu passasarombatanda<sup>b</sup> nu itayaddeno kama'da a makkararag.

#### **Ino Aggangwa A Tuntulan Naddino Bafabbayira A Mangurug Sino Pakkakarampattanda**

<sup>9</sup>Ino bafabbayira kappay, mabbarawasiyera nad si meannung sikwara a ammena kura nangina anna ammena makagayayung si lallaki. Ammera kappenad o'ganana mangarti sino abu'da anna sino baggira a miyekwa si nabalora aritus anna sillay andino korwana kunnenaya naangwa si bulawan onnu korwana nangina. Se ino dandammada nad, bakkannino pappaitanda sino kalawadda, <sup>10</sup>nu ammena lurino nalawara aggangwa a mangipaita sino angnurudda, se antuweno meannung sikwara a massapit si maddayawira ki Dios. <sup>11</sup>Aggasasina'ngaddino bafabbayira sino padalanda sino sapiti Dios anna natulukira nad sino manuldu sikwara. <sup>12</sup>Ammek purayan si ino bafabbayireno manuldu sino lallakiyera onnu matturay sikwara. Aggasasinakkira nabbelang. <sup>13</sup>Se sin pinaratuwi Diosino tolayira, pinaratuna abbuwi Adam, kasena i Eva. <sup>14</sup>E bakkanni Adamino nabalabaliyan, nu bakkan lurino bafay, antu gafuna, antuweno palunguwa nalliwat ki Dios. <sup>15</sup>Antu gafuna a mapadyatanino bafabbayira a manak, udde mesalakanira kappay,<sup>c</sup> nu ituluyda a mangurug ki Dios, manggam sino bafulundera, mabiyag si nadosan, anna naannad sino ammina akwanda.

---

<sup>b</sup> 2:8 Ino tata kappaya anggamma sapitanna yaw sino dami'na Griego: ...awana bungu'da onnu daladudwara... <sup>c</sup> 2:15 Ino tata kappaya anggamma sapitanna yaw sino dami'na Griego: ...udde meli'wera kappay...

### Ino Mapeafu Sino Pangafuwanirana Manguruwira

(Tito 1:5-9)

**3** <sup>1</sup>Gakkurug yawa sapit a ino manggamma mabbali si pangafuwanino manguruwira, nabalorino tarabafuwa anggamma. <sup>2</sup>Antu gafuna, ino pangafuwan, awan nadda kabalawanna. Tata kenaddino atawana e ammena nad mimbafay. Napalan nadda tolaya ammuna mifuwad sino panggammanino baggina, e iyatal naddino korwana tolay. Minappadilo'nad anna nalainga manuldu. <sup>3</sup>Ammena nad minagginum, ammena nad naladda a mabbungut onnu gumakkipakwa, nu ammena lud nannakanakam pelang. Ammena naggappay naingap si pirak. <sup>4</sup>Ammuna nadda inggurannino kataabbalayannera takesi manguruwino ana'ngera sikwana anna iyatalda. <sup>5</sup>Se nu ammena ammuwa minggud sino kataabbalayannera, damana kadda mimut sino makkakarampattira a mangurug ki Dios? <sup>6</sup>Ino pangafuwanino manguruwira, bakkan naddino bawuwa nangurug, tantaro nu passangele'na, e antuneno gafuna a kastiguni Dios a kunnaneno nakwa ki Satanas. <sup>7</sup>Nalawannaddino aggangwana massiki sino angngiteno ammera kepay nangurug, tantaro nu balawanda, e antuneno kakannanna sino baleti Satanas.

### Ino Mapeafu Sino Manuffunira Sino Pangafuwanirana Manguruwira

<sup>8</sup>Kunna kappay, ino mapilyera a manuffun sino pangafuwanirana manguruwira, meannungira naggappaya meyatal anna ammera nad massisiri. Ammera nad minagginum anna ammera nad naingap si pirak. <sup>9</sup>Natalanggannaddino angngurudda sino kakuruwana tulduwa nepakaammuwi Dios sikwatam, e ammura nad si mekunnenno akwanda sino kuruwanda. <sup>10</sup>Ino pilindawira a manuffun, dalodawandawira nad abbu takesi nu awana maammuwan si kabalawanda, kasera dama a mabbali si manuffun sino pangafuwanira. <sup>11</sup>E ino atawara kappay, meannungira nadda meyatal anna ammera nad mamaraparal. Napalanira nadda tolay<sup>d</sup> e matalakkira nad sino ammina akwanda. <sup>12</sup>Ino manuffunira sino pangafuwanira, tata kenaddino atawara anna ammera nad mimbafay. Ammura nadda inggurannino kataabbalayandera. <sup>13</sup>Nu nalawarino aggangwara sino tarabafura a manuffun, medayawira sino bafulundera, e ammera maatalla massapit mapeafu sino angngurudda ki Kristo Jesus.

### Ino Napatiyinke A Nepakaammuwi Dios Sikwatam

<sup>14-15</sup>Anggangku nadda malana umang sitan, udde tantaro nu matalantanak, antuweno iturakku yaw sikwam, takesi

---

<sup>d</sup> 3:11 Ino tata kappaya anggamma sapitanna yaw sino dami'na Griego: Ammera naggappay minagginum...

maammuwanuweno meannunga akwantama nesapat sino kataabbalayanino aggabiyaya Dios.<sup>e</sup> Se amminetama mangurug sikwana, meyampariyetam si ari anna fundasiyonneno balena, se ikkanetamino nitalakkanna sino kakuruwana tuldu takesi ituldutam si nalawara ammena maangkakwa. <sup>16</sup> Ammutam ammin si napatyingke ino kuruwantam mappeafu ki Kristo Jesus. Ammena nepakaammu si'in, udde nepakaammuwi Dios sikwatam sito ingkein:

I Kristo, nabbali si tolay. Nepakuruwino Espirituwi Dios si antuweno Abbingi Dios a awana kakunnaneno kinalawanna. Inita kappayino anghelira. Nebanyeno mappeafu sikwana si palubbun, e odduweno nanguruwira sikwana sito lubag. Netullu kappay sey langita kedayawanna.

### Ino Manulduwera Si Bakkanna Gakkurug

**4** <sup>1</sup> Nalawagino nepakaammuweno Espirituwi Dios a naso maddagguna aw, ananeno tolayira a ibbattandeno angngurudda ki Kristo Jesus ta kuruwandeno tulduwa mamalabali sikwara a maggawat sino dimonyuwera. <sup>2</sup> Ino manulduwera si kunnenay, massalasangkunira a mangurug anna massisiriyera. Gafu se nabayinna gagguriyatanda a mangwa si narakkat, ammenan malowino nakanda nu malliwatira. <sup>3</sup> Inayira a tolay, sapitanda si ammeneno mangatawa anna kammarallino korwana makkan. Udde ino kakuruwanna, pinaratuwi Dios ammina makkan ta akkanantama mangurug ki Kristo anna makaammu sino kakuruwana tuldu nu mappasalamatetam sikwana. <sup>4</sup> Se nalawad ammina pinaratuwi Dios, antu gafuna, awan nadda kammarallantam, nu ammetam lud appan ammina iya'dana, e mappasalamatetam sikwana. <sup>5</sup> Se mebilang si nalawad gafu sino sapiti Dios annino pappasalamatantam sikwana gafu sinay.

### Ino Nalawara Masserbi Ki Kristo Jesus

<sup>6</sup> Nu ituldum ammin inay sino kakkolattamira a mangurug sitan, nalawarino asserbim ki Kristo Jesus, e ipaitangkappay si naawatannungke ino kakuruwan mappeafu sino angnguruddam annino nalawara tulduwa sinuntulnu. <sup>7</sup> Aroyuwannu naddino iistoriyera pelanga awana serbina, se awana iduffunda sino angnguruddam ki Dios. Gawamannu nadda madal anna manuntul sino panggammani Dios. <sup>8</sup> Se nu pattuyaggantamino baggitam, ana payino bisangnga serbina, udde nu gawamantamino nakantama manuntul sino panggammani Dios, awana kiyanneno pallawaranna sikwatam, se malabutanetam si bawuwa biyaya maggawat ki Dios, bakkampelang sito ingkein, nu ammena lud si

<sup>e</sup> 3:14-15 Ino tata kappaya anggamma sapitan: ...sino pagyanaanino aggabiyaya Dios.

makkikiyad. <sup>9</sup>Gakkurug yawa sapitangku, e kuruwan nad ammina tolay. <sup>10</sup>Antu gafuna, iyekwatamino damatama manuldu sino kakuruwana tuldu, se ino innanamantam ino aggabiyaya Dios, a antuweno misalak sino ammina tolay, kumarallino manguruwira sikwana.

<sup>11</sup>Ituldum ammin inaya sinapikku sikwam sino manguruwira sitan, e tunannuwera ta tuntulanda. <sup>12</sup>Itannu nad ta awana kabalawannu gafu sino kinaabbingngu, nu ammeke lud mabbali si panuntulanino manguruwira. Nalawannaddino sapitannu anna nalawannaggappayino aggangwam. Ipaitammaggappay sikwareno agganggammu sino kasittolem, ino annala'ngu ki Dios, annino angngifuwannu sino baggim ta ino pelang panggammani Dios ino akwannu. <sup>13</sup>Ino anggangku si akwannu makkinyad si umangngak sitan, mibasaka sino sapiti Dios sino manguruwira, ituldum sikwareno anggamma sapitan, e tunannuwera ta tuntulanda. <sup>14</sup>Ammemmad purayanino pannakadama a neya'deno Espirituwi Dios sikwam sin nassapitanino mangipakaammuwera sino pelabbuni Dios annino nipotunanino pangafuwanirana manguruwira sino kama'da sikwam. <sup>15</sup>Aggadandammannu nad inayira a netungku sikwam ta iyekwamino ammina damama mangwa sinay takesi itanino ammina tolay si mallalawarino aggangwam. <sup>16</sup>Imutannungke naddino aggangwam annino annuldum, se nu mattalaginagga a mangwa sinay, bakkampelangino baggimino mesalakan, nu ammena kappelurino maningngaggira sikwam.

#### Ino Nalawara Annuldu Sino Manguruwira

**5** <sup>1</sup>Nu wara balawannu si narakkat sino manguruwira sitan, nannangka nadda manuldu sikwara. Nu lakay amma sikwam, ammem aallangngan, nu ammem lud tatabban si nalawara kunnangke amam. Mampesino lallakiyera a abbingira amma sikwam, tunannuwera a kunnangke kakkola'nguweru. <sup>2</sup>Kunna kappay sino bafabbayira a palungu sikwam, ibilangnguweru a kunnangke inam, e ino bafabbayira a abbingira amma sikwam, ibilangnguweru kappaya kunnangke kakkola'nguweru a awana narakkat si dandammannuwa akwan sikwara.

#### Ino Netuni Pablo Mapeafu Sino Manguruwira A Balu

<sup>3</sup>Ino bafabbayira a balu, duffunandawira nad nu awana wayira si mimut sikwara. <sup>4</sup>Udde nu wara abbinda onnu afura, ira naddino mimut sikwara. Maammuwanda nad si ino aggimu'da sino kataabbalayandeno palunguwa pangipaitanda sino angngurudda ki Dios, ta balattandeno nepimutino mapparana'dera andino a'afurera sikwara, se antuweno anggammi Dios. <sup>5</sup>Ino baluwa awaningke a mimut sikwana, innanamanna si i Diosino manuffun sikwana, antu gafuna, makakarakararag si aw anna gafiya marang si duffun sikwana. <sup>6</sup>Udde ino baluwa

aggeakakwanneno panggammanino baggina, kunnangke natayin ki Dios, massiki nu aggabiyaggepay. <sup>7</sup>Ituldumirenay sino manguruwira sitan, takesi awana balawannino korwanira a tolay sikwara. <sup>8</sup>Se nu wara massapit si mangurug ki Dios udde ammena imutannino wawwayinera, kumaral sino kataabbalayannera, sinalekkurannanino angngurungnga. Ino kunnenaya tolay, narakkattino aggangwana amma sino ammera mangurug ki Dios.

<sup>9</sup>Ino bafaluwera a ilistayuwa maduffunan, nalla'wutin nad si annammafuluveno dawunda, e namittera ke a nangatawa.<sup>f</sup>

<sup>10</sup>Naammuan nad ammina tolayino nalawara inangangwara a kunnayaw: nalawarino nepimu'da sino ana'dera, minappadilotira, tagatulutulukira a nasserbi sino bafulundera a mangurug,<sup>g</sup> minaduffunira sino mekakallakkira a tolay, e kanayunira a nadadana mangwa si massiki sanna a nalawad.

<sup>11</sup>Ino bafaluwera a ammera kepay kura bakat, ammeyuwera idagga sino listaan, se gumamwangngeno tiyempowa angganda a mangatawa, se mattuyangngeno panggammanino baggira amma sino gakkadda a masserbi ki Kristo. <sup>12</sup>E nu antuweno akwanda, makaliwatira<sup>h</sup> se talekkurandeno karira a masserbi ki Kristo. <sup>13</sup>Ino kappay gafuna a ammeyuwera nad ilista, mawamirana a amme mattarabafu. Mamalafalayirana a makakkiyayam, pakibiyangandaneno tarabafuveno korwanira, e iistoriyandaneno awana seserbina. <sup>14</sup>Antu gafuna, ino urek, nalawad nu makiatawa kappayino bafaluwera a ammera kepay kura bakat, ta manakira e wara imutanda sino bafalerera, se nu kunnenoy, awana gafuna a balawandetamino ammera kepay mangurug. <sup>15</sup>Kunnenayino sinapikku se anennino korwanira a baluwa sinalekkurandanino angngurudda e dinandaniran ki Satanas.

<sup>16</sup>Ino mauddiya sapitangku mapeafu sino bafaluwera, nu wara bafaya manguruwa aneno wawwayinera a balu, antu naddino mimut sikwara takesi ammena maidamanino bafulunnera a mangurug, takesi damara a duffunanino bafaluwera a awana mimut sikwara.

### Ino Netuni Pablo Mapeafu Sino Pangafuwanirana Manguruwira

<sup>17</sup>Ino pangafuwanira a nalawarino angngifuyu'da sino manguruwira, dadagganandonaddino tandanda, kumaral sino malappatta manuldu anna mangipakaammu sino sapiti Dios. <sup>18</sup>Se aneno nepeturakki Dios a kunna si, "Ammemmad gosalanino baka a aggeiriirik takesi damana a

<sup>f</sup> 5:9 Ino tata kappaya anggamma sapitan: ...e ammena nakibulun. <sup>g</sup> 5:10 Ino sapitanna sino dami'na Griego, *inunafandeno takkiyeno tolayira i Dios*. <sup>h</sup> 5:12 Adwa kappayino anggamma sapitanna yaw sino dami'na Griego: 1) ...paliwatandereno nakanda...; 2) ...paliwatandereno tolayira...

mangngan sino irikanna.”<sup>i</sup> E kunna kappay si, “Matandakanan naddino tolaya mattarabafu.”<sup>j</sup>

<sup>19</sup>Ammemmad kuruwan nu wara ipaliwa'da sino pangafuwanino manguruwira, nu awana tallu onnu adwa a mana'dag si gakkuruwa nalliwat. <sup>20</sup>Udde nu gakkuruwa nalliwat, ibuyammad sino nara'langanino ammina manguruwira, ta makatalawino korwanira a manuntul sikwana.

<sup>21</sup>Tunantaka sino a'langi Dios anni Kristo Jesus andino nadosanira a anghel ta kuruwannu inayira a sinapikku sikwama awana padumannu si massiki sanna a tolay, nu ammemira lud pakkakarunnan. <sup>22</sup>Nu wara pilinnuwa masserbi ki Kristo, ammeke nad makkangkama manotuk sikwana, nu ammem lud itan abbu nu meannung sino tarabafuna. Kanayungka nadda napalan takesi ammeke melot sino liwa'na korwan. Aroyuwannu nad ammina narakkat ta nalawad ammina akwannu.

<sup>23</sup>Bakkampelanga danumino inumannu, nu ammeke lud minungkappay si bisangnga tayug<sup>k</sup> ta maaganino taki'nenon kuyungngu, se namipidyaka a natakik.

<sup>24</sup>Mappeafu kappay sino dotukannuwa masserbi ki Kristo, dandammannu nad si ino korwanira a tolay, naammuwano liwa'da massiki nu ammera kepay nedarum. Ino korwanira kappay, ammena melasinino liwa'da, udde maammuwangkappena sino maddagguna aw. <sup>25</sup>Kakunnana kappayino tolayira a mangwa si nalawad, se aneno nalawara aggangwa a naladda a maammuan, e ana kappayino ammena malana maammuan, udde maammuanirana kappay so maddagguna aw.

### Ino Netuni Pablo Mapeafu Sino Aripannira

**6** <sup>1</sup>Antuyawino itungku sino aripannira a mangurug. Iyataldangke naddino amunda. Se nu ammera akwan inay, bakkampelangino aripannireno mabalaw, nu ammena kappeluri Dios andino ituldutam. <sup>2</sup>Ino aripannira a manguruggappayino amunda, ammera nad dandamman si massiki ammerera iyatal gafu se makkolakira si angngurug, nu ammera lud passerbiyanirangke si nalawad, se ino duffunanda sino tarabafura ino kola'da si angnguruwa iiddukani Dios.

### Ino Manulduwera Si Siri Andino Mangammira A Buma'ngang

Ira nad inayino ituldum anna itunnu sino manguruwira sitan. <sup>3</sup>Nu wara manuldu si tanganan sinay, a ammena mekunna sino kakuruwana netulduwi Jesu Kristo a Afutam annino ituldutam

<sup>i</sup> 5:18 Deuteronomio 25:4    <sup>j</sup> 5:18 Lucas 10:7    <sup>k</sup> 5:23 Ino tayungnga Judyu, naangwa si diyuna ubas.

mappeafu sino annuntul sino panggammani Dios, <sup>4</sup> antuweno tolaya passangele'nenno laingnga, gampade awangkena ammuna. Ino kunnenaya tolay, nakungkulinnino nakamma, se antu pelang anggammeno makisosombat mappeafu sino sapit anna makipakwa mappeafu sino awana serbina. Ino tupa'ngenaya aggangwana, ino imal, ino kontara, ino ammaraparal, annino appaliwat sino korwana tolay. <sup>5</sup> Inayira a tolay, kanayunira a makkakwa, se narakkattinnino nakanda, e inaroyuweran sino kakuruwana tuldu. Aridda si ino angngurudda ki Dios ino buma'nangnganda.

<sup>6</sup> Gakkuruwa aneno maappatam sino panguruwantam ki Dios, nu maanggammetam sino ana sikwatam, udde bakkanna kinaba'nang. <sup>7</sup> Se awana nelawantam sito lubag sino neyanakantam, e awangkappaya iyangkalintam nu matayetam. <sup>8</sup> Antu gafuna, nu wara damatama akkanan anna pabbarawasi, maanggammetamun nad. <sup>9</sup> Udde ino tolayira a makkabbata buma'nang, naladdera a matutunggungan, e kunnangke nakannera si balet gafu sino odduwa kabbatanda a awana serbina anna manaral sikwara, se ireno mituntul sikwara sino kakastiguwanda si makkikiyad. <sup>10</sup> Se ino kinaingapino tolay si pirak, antuweno paggabwatan ammuna gannunna kinarakkat. Gafu sinay, odduweno nattalekkud sino angngurudda ki Dios, e antuweno kallolow sino nakanda.

### Ino Korwana Netuni Pablo Ki Timoteo

<sup>11</sup> Udde ikka Timoteo a masserbi ki Dios, aroyuwannu nad ammin inay, ta iyekwamino damama mangwa si naggaddangnga antuweno panggammani Dios. Pattuyaggannu naddino angngurungngu ki Kristo annino agganggammu sikwana andino bafulunnuwera. Attammannu nad nu madyatangka, e nannakangka nad si ammina tolay. <sup>12</sup> Iyekwammaddino damama mangurug anna masserbi ki Kristo Jesus a kunnangke ino makiparesa a manggamma mangaffut takesi malabutangka si biyaya mannayun. Se antuweno namiliyani Dios sikwam sin nassapitannu si'ina mangurugga ki Kristo Jesus sino a'langino odduwa tolay. <sup>13</sup> Antu kappay yawino itungku sikwam sino a'langi Dios a mamiyag si ammin anni Kristo Jesus a nangita'dag sino kakuruwan sino a'langi Poncio Pilato. <sup>14</sup> Ino sapitangku, tuntulannungke naddino ammina netuldu sikwam mappeafu ki Dios anna imutannu takesi ammena madagganan si bakkanna gakkurug anna awana masapit si aneno kurangnga. Antu naddino akwannu makkiyad sino puliyani Jesu Kristo a Afutam. <sup>15</sup> Se nu duma'ngeno fustuwa tiyempo, gakkuruwa pulini Diosi Jesu Kristo sito lubag. I Dios pelangino madandayawa matturay si ammin, se antuweno Ariyeno amminira a ari anna Afuweno amminira a afafu. <sup>16</sup> Antu pelangino paggabwatanino biyaya mannayun se ammena matay. Awana tolaya makaara'ni sikwana se nappelalotino kilakilanneno

agyananna. Awaningke a tolaya nita sikwana e awangkappaya makaita sikwana si makkikiyad. Madayonad si makkikiyad se awana kakunnaneno pannakadamana. Amen.

<sup>17</sup>Sapitannu sino bafa'nangngira sito lubag ta ammera nad passangeletino ana sikwara. Sapitannu kappay sikwara si bakkan naddino kinaba'nandeno talakkanda se maawangkappekena, nu ammena luri Dios a ammena naawawita manga'da sikwatam sino ammina awantam takesi maanggammetam. <sup>18</sup>Ituldungkappay sikwara ta mangwera nad si nalawad takesi ba'nangngira naggappay si nalawara aggangwa. Ammera nad maituk si pirak, nu ammera lud nadadana manuffun si korwana tolay. <sup>19</sup>Se nu kunnenayino akwanda, kunnangke mampattira si kinaba'nang sey langit, e natalanggaddino innanamanda a maappareno kakuruwana biyag si makkikiyad.

<sup>20</sup>Timoteo, imutannungke naddino netalakki Dios sikwam. Aroyuwannuweno mattatarabbira sino awana serbina, a massasarombat mappeafu sino ngananda si kinalaing, udde awana kakuruwana. <sup>21</sup>Se aneno korwanira a gafu sino nanuntulanda sinaya kinalaing, sinalekkurandeno kakuruwana tulduwa kuruwantam.

Allakkandakayu nad ammini Dios.